

四庫全書

經部

欽定四庫全書

經部

六家詩名物疏卷十一

詳校官監察御史臣沈孫璉

通政使司副使臣莫瞻菴覆勘

總校官中書臣朱 鈞

校對官中書臣吳 俊

謄錄監生臣劉宗望

欽定四庫全書

六家詩名物疏卷十一

明 馮復京 撰

國風邶三

谷風篇

谷風

釋天云東風謂之谷風孫炎曰谷之言穀穀生也○毛傳云陰陽和而谷風至○呂氏春秋曰東方曰滔風○易緯云春分明庶風至

葍

毛傳云葍須也○爾雅云須葍從郭注未詳又云須葍
蕪郭注葍蕪似羊蹄葉細味酢可食○坊記注云葍蔓
菁也陳宋之間謂之葍○陸疏云葍蔓菁幽州人或謂
之芥○方言云蔓菁蕪菁也陳楚謂之蔓齊魯謂之蕪
關之東西謂之蕪菁趙魏之交謂之大芥其小者謂之
辛芥其紫華者謂之蘆服○尚書云荊州厥貢苞匭菁
茅○周禮醢人菁菹鹿藿注菁蔓菁也○急就篇云老

菁藜荷冬日藏○本草云蕪菁味苦子主明目圖經云
蕪菁四時仍有春食苗夏食心亦謂之臺子秋食莖冬
食根河朔尤多種可備飢歲常食之通中益氣令人肥
健南人取北種種之初年相類至二三歲則變為菘矣
○嘉話錄云諸葛亮所止令兵士獨種蔓菁取其纒出
甲可生啖一也葉舒可煑食二也久居則隨以滋長三
也棄不令惜四也迴則易尋采五也冬有根可斷食六
也三蜀之人今呼蔓菁為諸葛菜江陵亦然○嚴氏云

江南有崧江北有蔓菁相似而異○埤雅云梗長葉瘦高者為崧葉濶厚短者為蕪菁○日華子云蔓菁梗短葉大連地上生濶葉紅色者是

按爾雅兩釋須或本一物別三名耳諸書所稱各異爾雅云須葑從葑蕪方言云葑蕪蕪菁大芥坊記注云蔓菁本草圖經云薑子通志云塞北名九英共得十名但郭注葑蕪與本草說蔓菁形味頗異為可疑揚子雲又謂紫華者為蘆服不知蔓菁蘆服各一種

陶隱居言蔓菁子與蘆菔子相似然蔓菁子紫赤蘆菔子黃赤而大又不圓兩者全別郭注方言以葑為菘陶郭之誤皆緣江表不產蔓菁耳鄭箋云葑非根有美時有惡時諸書但言冬食根而不著根何時惡錢氏解下體云凡菜近地之莖葉多黃腐不可食蓋以鄭義為未安而易之矣

菲

毛傳云菲芴也○爾雅云菲芴郭注即土瓜也孫炎曰

菑類也又云菲蔥菜郭注菲草生下溼地似蕪菁華紫赤色可食○廣雅云土瓜芴也○崔實四民月令云二月盡三月可採土瓜根○陸疏云菲似菑莖麤葉厚而長有毛三月中蒸鬻為茹甘美可作羹幽州人謂之芴爾雅又謂之蔥菜今河內人謂之宿菜

按爾雅兩釋菲如郭所言殆是兩物張揖陸璣以為一物然郭所云土瓜絕無形種可的指本草有土瓜乃是月令之王瓜爾雅之鈎藤姑非此菲也

畿

毛傳云畿門內也○讀詩記云韓愈詩白石為門畿蓋以畿為門閫也必有所據可以發明毛氏之說○呂氏春秋曰出則以車入則以輦務以自佚命曰怡麗之機高誘曰怡至也麗機門內之位也

畿機音相近

茶

爾雅云茶苦菜○時訓解云小滿之日苦菜秀苦菜不秀賢人潛伏○陸璣云苦菜生山田及澤中得霜甜脆

而美所謂董茶如飴內則云濡豚包苦用苦菜是也○
儀禮云鉶芻羊苦○本草云苦菜味苦一名茶草一名
選一名游冬凌冬不死○顏之推云案易通卦驗玄圖
云苦菜生于寒秋更冬歷春得夏乃成今中原苦菜則
如此也一名游冬葉似苦苣而細摘斷有白汁花黃似
菊江南別有苦菜葉似酸漿其花或紫或白子大如珠
熟時或赤或黑此菜可以釋勞案郭璞注爾雅此乃臍
黃蔞也今河北謂之龍葵梁世講禮者以此當苦菜既

無宿根至春子方生耳亦大誤也○蜀本圖經云春花
夏實至秋復生花而不實經冬不凋○衍義云苦菜四
方皆有在北道則冬方凋斃在南方則冬夏常青葉如
苦苣更狹其綠色差淡味苦花與野菊似春夏秋皆旋
開花○詩緝云經有三茶一曰苦菜二曰委葉三曰英
茶此詩誰謂荼苦及唐采苓云采苦采苦繇董茶如飴
之荼皆苦菜也良耜以薈荼蓼之荼委葉也鄭出其東
門有女如荼英茶也鷓鴣子所將茶傳云莢苔疏云亂

之秀穗亦英茶之類

按爾雅有五茶釋草茶苦菜荼虎杖荼委葉葉荈茶
釋木檟苦茶詩中有三焉嚴坦叔論之備矣陶隱居
以茶茗為苦菜朱仲晦以谷風之苦菜為良耜之委
葉陸農師以苦菜茅秀是一物俱失詳考顏之推以
江南之苦菜為臈云即龍葵然龍葵子無殼苦臈子
有殼又相似而不同

薺

爾雅差薺實疏引詩其甘如薺○本草云薺味甘溫主
利肝氣和中陶隱居注云薺類多此是今人可食者藥
作菹羹亦佳○禮云孟夏之月靡草死鄭注薺亭藿之
屬○春秋繁露云薺以冬美冬水氣也薺甘味也乘于
水氣而美者甘勝寒也薺之為言濟與濟大水也○淮
南子云薺麥冬生而夏死○師曠占云歲欲豐甘草先
生甘草薺也○雅翼云薺亦應陰之物其枝細靡謂之
靡草○通志云薺之菜甚小自生園圃或以為薺芘

按爾雅又云斝奠大齋本草斝奠在草部味辛非可食之齋也陳藏器又以大齋為葶藶然斝奠葶藶總之皆齋類耳

昏

釋名云昏昏時成禮也姻女因媒也○周禮大宗伯云以昏冠之禮親成男女○釋親云婦之父為婚婦之黨為婚兄弟

涇

周官云雍州其川涇汭○書云涇屬渭汭孔安國曰言
治涇水入於渭○廣雅云涇徑也○地理志云涇水出
安定涇陽縣西岍頭山東南至馮翊陽陵縣入渭行千
六百里○山海經云涇谷之山涇水出焉東南流注于
渭是多白金白玉○史記云涇渭非大川以近咸陽得
比山川祠○漢書云涇水一石其泥數斗○關中記云
涇與渭洛為關中三川與渭灞澇潏瀋澧瀆為關中八
水○初學記云涇與渭水合流三百里清濁不相雜東

合漆沮水至潼津入于河

按涇水出陝西平涼府鎮原縣西筭頭山至涇州又東南至西安府邠州界又東北至西安府高陵縣入

渭

渭

書云導渭自鳥鼠同穴東會於澧又東過漆沮入於河
○周官云雍州其浸渭洛○春秋說題辭云渭之為言
布也渭渭流行貌○河圖云鳥獸同穴山地之幹也渭

水出其中象天河○水經云渭水出隴西首陽縣渭谷亭南烏鼠山○淮南子云渭水多力宜黍○地里志云東至京兆府司空縣入河○傳涇渭相入而清濁異

按渭水源出陝西臨洮府渭源縣

漢首陽縣

烏鼠山西北

谷流逕鞏昌府秦州又經鳳翔府寶雞縣至岐山縣入西安府武功縣北興平縣南至咸陽縣界豐水南來注之又東過長安縣北與涇水合于高陵東流至華陰縣界入河

梁

爾雅疏云以土石為隄障絕水者名梁○周禮敝人掌以時敝為梁鄭司農云梁水堰堰水而為闕空以笱承其空○王制云獺祭魚然後虞人入澤梁○漢書董卓傳云築梁捕魚

笱

說文云曲竹捕魚笱也从竹从句句亦聲○朱傳云以竹為器承梁之空以取魚者也○周禮疏云偃水兩畔

中央通水為闕孔筍者葦薄以薄承其闕孔魚過者以薄承取之

按筍之為字从竹不从草則許慎朱子所釋是也賈公彥以為葦薄者蓋以留為寡婦之筍葦薄為之故也不知所以名寡婦之筍以其功易則筍為功難必是以竹為之

民

說文云衆萌也萌而無識○援神契云民者冥也○公

羊傳注四民德能居位曰士辟土殖穀曰農巧心勞手
以成器物曰工通財貨曰商

喪

白虎通云人死謂之喪言其亡不可見也生者哀痛之
亦稱喪○釋名云人死氣絕曰死死漸也就漸消也士
曰不祿大夫曰卒諸侯曰薨天子曰崩少壯曰死曰夭
未二十而死曰殤尸已在棺曰柩於西壁下塗之曰殯
朔望祭曰殷奠所用殷衆也既葬還祭於殯宮曰虞謂

虞樂安神使還此也又祭曰卒哭止孝子無時之哭朝夕而已也又祭曰祔祔於祖廟也期而小祥又期而大祥間月而禫亦祭名也○周禮大宗伯以凶禮哀邦國之憂以喪禮哀死也○王制云天子七日而殯諸侯五日而殯大夫士庶人三日而殯○左傳云天子七月而葬同軌畢至諸侯五月同盟至大夫三月同位至士踰月外姻至○禮書云易繫辭曰古之葬者厚衣之以薪葬之中野不封不樹喪期無數後世漸文故為冠經衰

裳帶屨以飾之於是有斬齊功總袒免之等三年期九月七月三月之別然後情文稱而恩義立矣

賈

白虎通云商之為言商商其遠近度其有無通四方之物故謂之商賈之為言固固有其用物以待民來以求其利者也行曰商止曰賈○周禮太宰以九職任萬民六曰商賈阜通貨賄市師以商賈阜貨而行布凡市偽飾之禁在賈者十有二

冬

尚書云申命和叔宅朔方曰幽都平在朔易日短星昴以正仲冬○書大傳云北方者伏方也伏方者萬物之方伏也伏方何以謂之冬冬者中也中也者物方藏于中也陽盛則吁荼萬物而養之外陰盛則呼吸萬物而藏之內故曰呼吸者陰陽之交接萬物之始終○爾雅云冬為玄英注氣黑而清英○夏小正云十月豺祭獸黑烏浴十二月玄駒賁○月令云孟冬之月日在尾昏

危中旦七星中其日壬癸其帝顓頊其神玄冥其蟲介
其音羽律中應鍾水始冰地始凍雉入大水為蜃虹藏
不見天氣上騰地氣下降天地不通閉塞而成冬仲冬
之月日在斗昏東壁中旦軫中律中黃鍾冰益壯地始
坼鷓旦不鳴虎始交日短至陰陽爭諸生蕩芸始生荔
挺出蚯蚓結麋角解水泉動季冬之月日在婺女昏婁
中旦氐中律中大呂雁北鄉鵲始巢雉雞乳征鳥厲
疾冰方盛水澤腹堅是月也日窮于次月窮于紀星回

于天數將幾終歲且更始○素問云冬三月此謂閉藏
水冰始坼無擾乎陽○楚語觀射父云日月會于龍罔
土氣含收天明昌作百嘉備舍國家于是乎蒸嘗賈逵
曰罔龍尾也○呂覽云冬之德寒寒不信其地不成剛
地不成剛則凍閉不開○月令注云孟冬日月會于析
木之津仲冬日月會于星紀季冬日月會于玄枵○漢
書魏相奏云北方之神顓頊乘坎執權司冬○釋名云
冬終也物終成也

式微篇

中露泥中

附黎

毛氏云中露泥中衛邑箋云黎國在衛西○水經黎陽縣注式微黎侯寓于衛是也又云跨河東逕黎縣故城南注云世謂黎侯城替黎侯寓于衛詩謂胡為乎泥中毛云邑名疑此城也土城汚下城居小阜魏濮陽郡治也○杜預左傳注黎侯國上黨壺關縣有黎亭○黃氏曰今潞州上黨黎城壺關三縣皆古黎國地○林氏曰

周人乘黎河北之要害也○古今山川記云黎侯寓衛
以中露泥中二邑處之

按黎陽縣今廢在直隸大名府濬縣西二里黎縣即
廢臨河縣在大名府開州西六十里衛泥中邑即此
地也中露古人所未詳潞州屬山西上黨縣今省入
州壺關黎城二縣竝屬潞州黎侯城在黎城縣東北
十八里左傳宣十五年晉侯將伐潞伯宗曰狄有五
罪棄仲章而奪黎氏地其三也六月癸卯荀林父敗

赤狄于曲梁卒滅潞秋七月壬午晉侯治兵于稷以畧狄土立黎侯而還依此文則滅黎者赤狄也其事當衛穆公之世此詩不當序於宣公之前毛鄭不云聊以傳疑爾

旄丘篇

旄丘

爾雅云前高旄丘李巡曰謂前高後卑下○釋名云前高曰髦丘如馬舉頭垂髦也○一統志旄丘在大名府

開州城北

丘

說文云土之高也非人所為也从北从一一地也人居在丘南一曰四方高中央下為丘象形○爾雅云丘一成為敦丘再成為陶丘再成銳上為融丘三成為崑崙丘如橐者橐丘如階者階丘水潦所止泥丘方丘胡丘絕高為之京非人為之丘水潦所還埒丘上正章丘澤中有丘都丘堂途梧丘途出其右而還之畫丘途出其

前戴丘途出其後曷丘水出其前渚丘水出其後沮丘
水出其左正丘水出其右營丘如覆敦者敦丘邈迤沙
丘左高咸丘右高臨丘前高旄丘後高陵丘偏高阿丘
宛中宛丘背有丘為負丘左澤定丘右陵泰丘如畝
畝丘如陵陵丘丘上有丘為宛丘陳有宛丘晉有潛丘
淮南有州黎丘天下有名丘五三在河南二在河北○
廣雅云小陵曰丘○周禮丘陵動物宜羽植物宜穀其
民專而長○毛公防有鵲巢傳云邱丘也

狐

說文云狐禊獸也鬼所乘之有三德其色中和小前大後死則背丘○本草陶隱居注云江東無狐皆出北方及益州間形似狸而黃叢能為魅圖經云今江南亦時有京洛尤多形似黃狗鼻尖尾大狐之類獬獬貉三種大抵相類頭足小別○爾雅云狸狐獬獬醜其足蹠其跡瓜注蹠皆有掌蹠瓜指頭處○山海經云青丘之國有狐九尾武都之山有玄狐蓬尾○名山記云狐者

先古之淫婦其名曰紫紫化而為狐故其性多自稱阿紫○玉策記云狐及狸狼皆壽八百歲滿三百歲暫變為人形○北征記云河水厚數丈冰始合車馬未過須狐先行此物善聽聽水無聲乃過○水經注云狐性多疑故俗有狐疑之說○管子云代出狐白之皮狐應陰陽之變六月而一見○類從曰狐潛上伏不越度阡陌○埤雅云狐性好疑獬性好睡又皆藏獸故狐貉之厚以居而蜡祭息民以狐裘也舊說狐有媚珠禮北斗而

靈龜變化其為物妖淫故詩又以刺惡易曰小狐汔濟
濡其尾亦其尾重龜濡溺故易正以為象狼狐搏物皆
以虛擊狐狐从狐省或以此故也○雅翼云狐銜口而
大尾色赤所在鳥輒羣而噪之蓋妖祥之禽所占也春
秋外傳曰狐埋之狐搨之是以無成功皆執心不定之
貌

裘

說文云裘皮衣也○周禮司裘掌為大裘以共王祀天

之服中秋獻良裘

王所服

王乃行羽物季冬獻功裘以待

頒賜○月令云孟冬天子始裘○玉藻云惟君黼裘以

誓省

當作彌

大裘非古也君衣狐白裘錦衣以裼之君之

右虎裘厥左狼裘士不衣狐白君子狐青裘豹裘玄綃

衣以裼之麕裘青紆褰絞衣以裼之羔裘豹飾緇衣以

裼之狐裘黃衣以裼之錦衣狐裘諸侯之服也犬羊之

裘不裼不文飾也不裼裘之裼也見美也服之襲也充

美也弔則襲不盡飾也君在則裼盡飾也是故尸襲執

玉龜襲無事則裼弗敢充也童子不裘不帛禮不盛服
不充故大裘不裼○白虎通云裘所以佐女工助溫也
古者緇衣羔裘黃衣狐裘禽獸衆多獨以狐羔取其輕
煖因狐死首丘明君子不忘本也羔取其跪乳遜順也
○五經要義云古者著裘于內而以繒衣覆之乃加以
朝服會之時袒其朝服見裘裏覆衣謂之裼裼之言露
可見之詞所以示美呈好而為飾加以朝服謂之襲袒
謂之裼大裘不裼反本取其質也

按狐裘有三錦衣狐裘天子之朝服諸侯于天子之朝天子卿大夫及諸侯卿大夫在天子之朝亦得服之黃衣狐裘蜡祭後臘先祖之服毛注此狐裘云大夫狐蒼裘蒼青同色所謂君子狐青裘豹袖玄綃衣以裼之者也鄭彼注云君子大夫士也綃綺屬染之以玄於狐青裘相宜狐青裘蓋玄衣之裘皇氏云玄衣謂玄端也狐青裘所施禮無明說皇氏以為畿內諸侯朝服用緇衣畿外用玄衣無所援據鄭注周禮

云功裘人功微麤謂狐青麤裘之屬鄭司農云功裘
卿大夫所服則二鄭之意皆不以狐青為諸侯之朝
服在朝君臣同服卿大夫可推論語云狐貉之厚以
居蓋狐讎疑貉讎睡疑斯戒睡斯安燕息者之事也
狐青裘必卿大夫之燕服矣都人士狐裘黃黃則庶
人亦服黃狐裘先儒以為不裼又春秋之戎服亦以
狐裘左傳臧之狐裘敗我于狐駘是也

流離

爾雅云鳥少美長醜為鷓鴣郭注鷓鴣猶留離詩所謂
流離之子○陸璣疏云流離梟也自關而西謂梟為流
離其子適長大還食其母故張奐云鷓鴣食母許慎云
梟不孝鳥是也○爾雅又云梟鴟注土梟○說文梟食
母不孝之鳥故冬至捕梟磔之字从鳥皆在木上○劉
子云炎州有鳥其名曰梟偃伏其子百日而長羽翼既
成食母而飛○埤雅云梟食母破鏡食父舊說梟食母
始飛黃帝欲絕其類使百司用之故後世於歲始祓除

凶災取以解祠黃帝漢使東郡送梟五月五日作羹以賜百官此遺象也○雅翼云土梟穴土而居故曰土梟而荆楚歲時記稱鳩鵂為土梟說者云鳩鵂穴居誤矣○按梟與鴉音近物殊梟者流離也鴉者似鵬之鳥也

充耳

釋名云充耳充塞也塞耳亦所以止聽也○淇奧傳云充耳謂之瑱天子玉瑱諸侯以石○著箋云所以懸瑱者或名為統織之人君五色臣則三色而已○禮緯云

旒垂目纒塞耳示不聽讒不視非也○羅氏云瑱以玉為之以纒縛之而屬于統縣之當耳統織如條上屬于衡

按弁師云諸侯玉瑱鄭注冬官玉人云公侯四玉一石伯子男三玉二石則諸侯得用玉毛云諸侯以石蓋失之白公子張曰巴浦之犀犂兕象其可盡乎其又以規為瑱也依此文是四獸之牙角可以為瑱檀弓云練角瑱所以垂克耳者謂之統魯語王后織玄

統夫人加紘經內子為大帶命婦成祭服列士之妻
加之以朝服則自夫人至士妻持有所加而已士喪
禮曰瑱用白纁東方朔傳曰黹纁塞耳則人君與士
之纁有黃與白之別而已其統五色三色之辨未詳
聞也

耳

釋名云耳形也耳有一體屬著兩邊形形然也○元命
包云耳者心之候○真誥云耳者身之牖聽衆則牖閉

○左傳富辰云耳不聽五聲之和為聾目不別五色之章為昧

六家詩名物疏卷十一

欽定四庫全書

六家詩名物疏卷十二

明 馮復京 撰

國風邶四

簡兮篇

方

傳云方四方也以干羽為萬舞用之宗廟山川○書云
柴望秩于山川○禮記云諸侯方祀祭山川歲徧又云
天子祭天下名山大川諸侯祭名山大川之在其地者

○周禮大宗伯以蕤沈祭山林川澤司服毳冕以祀山川大司樂奏牲賓歌函鍾舞大夏以祭山川舞師教兵舞帥而舞山川之祭祀○爾雅云祭山曰廋懸祭川曰浮沈

按毛解方云四方而繼以用之山川則山川為四方矣以社以方傳云迎四方氣于郊鄭康成釋舞師云四方四望也其說各異舞師教羽舞帥而舞四方之祭祀教兵舞帥而舞山川之祭祀而毛云以干羽為

萬舞用之山川者天子禮大山川與四望別諸侯惟祭域內山川而已此傳之四方非周官舞師之四方也

萬

毛傳云以干羽為萬舞○鄭注此及魯頌萬舞洋洋皆云干舞也○左隱五年傳云考仲子之宮將萬焉公問羽數于衆仲疏萬是舞之大名○左莊二十八傳云子元欲盡文夫人為館于其宮側而振萬焉夫人聞之泣

曰先君以是舞也習戎備也○公羊宣八年有事于太廟仲遂卒于垂壬午猶繹萬入去籥傳云萬者何干舞也籥者何籥舞也何休云干謂盾也能為人扞難而不使害人故聖王貴之以為武樂萬者其篇名武王以萬人服天下民服之故名之云爾籥所吹以節舞也吹籥而舞文樂之長○夏小正云二月丁亥萬入用籥○劉炫左氏說云羽者為文萬者為武武則左執朱干右秉玉戚文則左執籥右秉翟○韓詩說云萬以夷狄大鳥

羽○異義公羊說云樂萬舞以鴻羽取其勁輕一舉千里

按呂東萊讀詩記云萬者二舞之總名干舞者武舞之別名也籥舞者文舞之別名也文舞又謂之羽舞以今考之書大禹謨舞干羽于兩階孔安國云舞文舞于賓主階間抑武事是干舞亦得為文舞矣左傳將萬而問羽數何休說云婦人無武事獨奏文樂夏小正萬入用籥是羽舞籥舞名萬矣息媯聞振萬曰

先君以是舞習戎備是干舞名萬矣依左傳疏萬是舞之大名孔傳干亦文舞者蓋取干以自蔽不主殺敵故云文其實干是武舞也萬專為干舞自是大戴公羊之說左傳注已不依用魯頌萬舞洋洋商頌萬舞有奕商魯之廟其舞豈應存武而廢文耶毛釋萬兼干羽而言義優于鄭又何休云武王以萬人服天下故舞名萬殊不知商已有萬舞矣

舞

呂氏春秋云陶唐氏之始陰多滯伏民氣壅闕故作舞以宣導之○山海經云帝俊八子始為舞○左傳衆仲云天子用八諸侯用六大夫四士二夫舞所以節八音而行八風故自八以下又云季札觀周樂舞象箛南籥大武韶濩大夏韶箛注云象箛南籥文王之樂韶濩殷湯樂○周禮舞師掌教兵舞帥而舞山川之祭祀教帔舞帥而舞社稷之祭祀教羽舞帥而舞四方之祭祀教皇舞帥而舞旱暵之事凡野舞則皆教之凡小祭祀不

興舞鼓人職注云兵謂干戚帔列五采繒為之舞師職
注云羽析白羽為之形如帔皇析五采羽為之亦如帔
又云大司樂以樂舞教國子舞雲門大卷大咸大磬大
夏大濩大武雲門之舞圜丘奏之咸池之舞方丘奏之
九磬之舞宗廟奏之樂師教國子小舞凡舞有帔舞有
羽舞有皇舞有旄舞有干舞有人舞注云旄舞者旄牛
之尾干舞者兵舞者手舞鄭司農云社稷以帔宗
廟以羽四方以皇辟雍以旄兵事以干星辰以人後鄭

云四方以羽宗廟以人山川以干旱暵以皇大胥掌學士之版以待致諸子春入學合舞以六樂之會正舞位以序出入舞者籥師祭祀鼓羽籥之舞賓客饗食亦如之司干掌舞器諸子凡樂正舞位授舞器司兵祭祀授舞者兵司戈盾祭祀授旅賁及故士戈盾韎師掌教韎樂祭祀則帥其屬而舞之旄人掌教舞散樂舞夷樂○文王世子云養老下管象舞大武注云象周武王伐紂之樂以管播其聲又為之舞內則云十三舞勺成童舞

象二十而冠舞大夏明堂位云升歌清廟下管象朱干
玉戚冕而舞大武皮弁素積裼而舞大夏樂記云屈伸
俯仰綴兆舒疾樂之文也夔始制樂以賞諸侯其治民
勞者其舞行綴遠其治民逸者其舞行綴短又云舞動
其容也先鼓以警戒三步以見方再始以著往復亂以
飭歸奮疾而不拔極幽而不隱疏云謂作大武之樂也
又云總干而山立武王之事也發揚蹈厲大公之志也
武亂皆坐周召之治也且夫武始而北出再成而滅商

三成而南四成而南國是疆五成而分周公左召公右
六成復綴以崇天子祭統云及舞君為東上冕而總干
率羣臣以樂皇尸又云舞莫重于武宿夜

庭

說文云庭宮中也○讀詩記云庭在大門之內寢門之
外○玉海云堂下至門謂之庭○莊子循本云庭堂外
地也

虎

說文云虎山獸之君也○爾雅云虺白虎魑黑虎熊虎
醜其子狗絕有力麋○方言云陳魏宋楚之間或謂之
李父江淮南楚之間謂之李耳或謂之於輓自關東西
或謂之伯都○易曰雲從龍風從虎○運斗樞云樞星
散為虎○通卦驗云立秋虎始嘯○易又云大人虎變
其文炳也○月令云仲冬虎始交○考異郵云三九二
十七七者陽氣成故虎七月而生陽立于七故虎首尾
長七尺般般文者陰陽雜也○元命包云猛虎嘯谷風

起類相動也○論衡云虎出有時猶龍見有期也陰物以冬見陽蟲以夏出○漢紀楊賜曰虎者金行參伐之精狼戾之獸○博物志云虎知衝破又能畫地卜食今人有畫物上下者推其奇偶謂之虎卜○雅翼云虎性至猛烈雖遭逐猶徘徊顧步搏物不過三躍不中則捨之夜以一目放光一目看物獵人候而射之目光墮地得之如白石子生三日即有食牛之氣

轡

爾雅云鑣謂之鑣載轡謂之轡轡首謂之革注鑣馬勒
旁鐵也轡車軛上環轡所貫也革轡鞞勒○釋名云轡
拂也言牽引拂戾以制馬也轡之為飾有銜勒羈韁鞞
之類以成其用也銜在口中之言也勒絡也絡其頭而
引之鑣包也在旁包斂其口也羈檢也所以持制之也
韁疆也繫之使不得出疆限也韁亦曰勒故埤蒼曰勒
馬韁也鞞控制之義○家語曰善御馬者正身以總轡

組

禮記疏云組紉俱為條也皇氏云組是綬也然則薄濶為組似繩者為紉○說文云組綬屬其小者以為纓○周禮典絲凡飾邦器者受文織絲組○漢書云錦繡纂組害女工者也

簫

爾雅云大簫謂之產其中謂之仲小者謂之箛注簫如笛三孔而短小○毛傳云簫六孔○廣雅云簫謂之笛有七孔○釋文云以竹為之長三尺執之以舞○周禮

笙師掌教敝籥鄭注籥如遂三孔又云籥師掌教國子
舞羽敝籥祭祀則鼓羽籥之舞賓客饗食亦如之○文
王世子云春夏學干戈秋冬學羽籥○陳暘云籥所以
為聲聲由陽來故執籥于左左陽故也○趙岐孟子注
云執籥以節衆也○何休公羊注云籥所吹以節舞○
釋名云籥躍也氣躍出也○宋書樂志云籥不知誰所
造今凱容宣烈舞所執羽籥是

翟

爾雅云鶴山雉郭璞曰尾長者今俗呼山雞○禹貢徐
州羽畎夏翟傳云羽中旌旄羽山之谷有之○禽經注
云山雉長尾尤珍護之林木之森鬱者不入恐觸其尾
也雨則避于崑石之下恐濡濕也久雨亦不出而求食
死者甚衆○樂書云容自陰作故秉翟于右右陰故也
左傳五雉爾雅十二雉而舞之所取者特翟山雉耳以
其羽猶可用為儀執之以舞所以為蔽翼者也又云記
曰比音而樂之及干戚旄羽謂之樂又曰干戚旄狄以

舞之言羽又言狄何也后之六服褱衣搖狄闕狄褱衣
績翬狄于衣爾雅謂素質五色皆備成章者也揄狄績
揄狄于衣爾雅謂青質皆備成章者也所謂羽者豈翬
狄揄狄之羽與○古今注云殷高宗時有雉雉之祥服
章多用翟羽周制以為王后夫人之車服

按陳氏樂書其釋翟也既以為山雞其釋羽舞也又
以為翬鷄一家之說自相抵牾然翬鷄皆有狄名后
之五路重翟厭翟安知不以青素質五色成章者飾

之或翟是雉之通名舞師注羽舞析白羽白雉為瑞
鳥不易得必是鍾氏之所染矣

赭

說文云赤土也○鄆山海經注云紫赤色○子虛賦云
其土則丹青赭堊

錫爵

禮記云祭有畀輝胞翟闇寺者惠下之道也翟者樂吏
之賤者也○毛傳云見惠不過一散○朱傳云即儀禮

燕飲而獻工之禮

按鄭以公庭為宗廟故引畀翟朱不拘祭祀故引獻
工畀翟在祭之末惠以五升之散獻工之禮則鄉飲
酒鄉射燕禮大射俱有之大畧卒歌主人獻工一人
拜不興受爵主人拜送爵鄉飲鄉射于阼階上燕禮
大射于西階上薦脯醢使人相祭工飲不拜既爵授
主人爵衆工則不拜受爵辨有脯醢不祭工不辭洗
笙入主人獻之于西階上一人拜盡階不升堂受爵

主人拜送爵階前坐祭立飲不拜既爵升授主人爵
衆筮則不拜受爵坐祭立飲辨有脯醢不祭惟大射
不獻筮畧下樂也然合此二說推之此碩人非士復
非府史何者若士則尸飲九已有散爵之獻若府史
亦恐不在工歌之列殆是樂正之下衆工禮云賤吏
是也

爵

說文云禮器也象爵之形中有鬯酒又持之也所以飲

器象爵者取其鳴節節足足也○周禮太宰祀五帝大
神亦享先王贊玉爵內宰后裸獻贊瑤爵梓人為飲器
勺一升爵一升觚三升獻以爵而酬以觚一獻而三酬
則一豆矣食一豆肉飲一豆酒中人之量也鄭注觚當
為觶豆當為斗○月令反執爵于大寢命曰勞酒禮器
琥璜爵又云宗廟之祭貴者獻以爵賤者獻以散尊者
舉觶卑者舉角明堂位爵夏后氏以琖殷以斝周以爵
又云爵用玉琖仍雕加以璧散璧角少儀客爵居左其

飲居右介爵酢爵俱爵皆居右○韓詩說云爵盡也足也二升曰觚觚寡也飲當寡少三升曰觶觶適也飲當自適也四升曰角角觸也不能自適觸罪過也五升曰散散訕也飲不自節為人所謗訕也總名曰爵其實曰觴觴者餉也觥亦五升所以罰不敬非所以餉不得名觴○三禮圖云爵受一升尾長六寸博二寸傅翼兗下方足漆赤雲氣○禮書云祭統尸酢夫人執柄夫人受尸執足柄其尾也有足而尾命之以爵蓋制若雀然也

吉禮之爵全篆明堂位加以璧散璧角則天子自解而
上用玉矣燕禮大射以象觚象解獻公則諸侯之爵用
象矣燕禮司正飲角解士喪禮奠亦角解蓋大夫飾以
角士木而已喪奠用角解攝盛也解中觴也先儒言諸
觴皆形制同而升數異然爵如雀觚不圓形安得而同
哉書稱上宗奉同則周爵又謂同也○埤雅云雀豹古
今注曰九月雀入水不則多淫泆酒善使人淫泆故一
升曰爵所以戒也

榛

說文云栗果實如小栗榛木也

今書傳通作榛

○詩義疏云榛

栗屬有二種其一種之皮葉皆如栗其子小形如杼子
表皮黑味亦如栗所謂樹之榛栗者也其一種枝莖如
木蓼生高丈餘作胡桃味遼代上黨皆饒○周禮籩人
云饋食之籩其實榛○曲禮云婦人之贄椶榛棗栗內
則云棗栗榛柿○爾雅翼云榛枝莖如木蓼葉如牛李
色高丈餘子如小栗核中悉如李生則胡桃味膏燭又

美亦可噉漁陽遼代上黨皆饒鄭注禮曰似栗而小關
中廊坊甚多然則其字从秦蓋此意也又一種大小枝
葉如栗其子形如杼味亦如栗所謂樹之榛栗者是大
木非榛楛之榛若女贄則宜兩者皆可用○本艸圖經
云桂陽有栲而叢生實大如杏子中仁皮子形色與栗
無異但差小耳又有與栗皆與栗同子圓而細或云即
栲也今此色惟江湖有之

按說文以榛為木而栲為果然則山有榛之榛當作

柔而樹之榛栗宜為榛矣詩義疏爾雅翼皆云有二種但莖如木蓼既似櫟樹之形子形如杼復似櫟樹之實羅氏以樹榛之榛為大木而所云生高丈餘者又非小木兩榛俱有實如栗今之榛實較胡桃與栗並自不同未知何以別異本艸注柔于栗條下且引陸璣疏則所謂如杏子中仁與栗皆樹榛之榛矣既未詳古人旨趣聊備釋云

隰


釋名云濕蟄也濕蟄意也○說文曰濕坂下濕也○尚書傳云下而平者謂之濕濕之言猶濕也○周禮大司徒以土會之法辨五地之物生五曰原濕其動物宜羸物其植物宜叢物其民豐肉而庠

苓

爾雅云藟大苦部云今甘艸也蔓延生葉似荷青黃莖赤有節節有枝相當或云藟似地黄疏唐風采苓首陽之顛是也藟苓字異音義同○本艸云解百藥毒為九

土之精安和七十二種石一千二百種艸久服輕身延年一名密甘一名美艸一名密艸一名落草圖經云甘艸河西川谷積沙山及上郡今陝西河東州郡皆有之春生青苗高一二尺葉如槐葉七月開紫花似柰冬結實作角子如畢豆根長者三四尺麤細不定皮赤上有橫梁梁下皆細根也有數種以堅實斷理者為佳詩采苓首陽首陽山在河東蒲坂縣今甘艸所生處相近而先儒說苗葉與今全別豈種類有不同者乎○筆談云

甘艸枝葉悉如槐高五六尺但葉端微尖而糙澁似有
白毛子如小扁豆齒嚙不破



六家詩名物疏卷十二

欽定四庫全書

經部

六家詩名物疏卷十三

詳校官監察御史臣沈孫璉

通政使司副使臣吳瞻萊覆勘

總校官中書臣朱 鈐

校對官中書臣吳 俊

謄錄監生臣劉宗望

謄錄監生臣胡觀瀾

欽定四庫全書

六家詩名物疏卷十三

明 馮復京 撰

國風邶五

泉水篇

泉水

藍田呂氏曰泉水即今衛州共城之百泉也淇水出相州林慮縣東流泉水自西北來注之故曰亦流于淇而竹竿詩言泉源在左淇水在右者蓋主山而言之相衛

之山東面故以北為左以南為右○水經注泉源水有二源一水出朝歌西北又東與左水合謂之馬溝水又美溝水出朝歌西北大嶺下更出逕駱駝谷於中逶迤九十曲故俗有美溝之目歷十二崿崿流相承泉響不斷○寰宇記澶州頓丘縣東北三十五里有泉源祠○一統志泉源在頓丘右城東北頓丘城在大名府清豐縣西南

按呂云衛州共城即今河南衛輝府輝縣古共伯國

衛都朝歌今大名府濬縣境共城在朝歌西南相州
林慮縣即彰德府林縣也在朝歌西北泉水與淇合
當在于此一統志謂潁丘有泉源又謂衛河源出輝
縣則百泉即衛河之源也

淇

山海經云沮洳之山淇水出焉南流注于河○水經云
淇水出河內隆慮縣西大號山東過內黃縣南為白溝
屈從縣東北與洹水合過廣宗縣東為清河○通典云

淇水至衛州衛縣界入河謂之淇水口古朝歌也衛居
河淇之間○一統志淇水源出林慮縣山中綿歷太行
而東至大名府濬縣枋頭東流入衛河衛河源自輝縣
經大名府濬內黃二縣下流與淇漳滹沱等河合至直

沽入海

大名府濬縣即
古衛州衛縣

衛

地里志云河內朝歌縣紂所都康叔所封更名衛○左
傳祝佗曰分康叔封畛土略自武父以南及圃田之北

竟封于殷墟○朱傳云衛本都河北朝歌之東淇水之北百泉之南其後不知何時并得邶鄘之地至懿公為狄所滅戴公東徙渡河野處漕邑文公又徙居楚丘大抵今懷衛澶相滑濮等州開封大名府界皆衛境也○元命包云營室流為并州分為衛國之鎮

按朝歌故城在大名府濬縣西七十里懷州今懷慶府衛州今衛輝府相州今彰德府竝隸河南開封府今仍舊名雜有宋衛陳鄭杞許之地澶州今開州滑

州今滑縣竝屬隸大名府濮州今屬山東東昌府

諸姬

箋云諸姬未嫁之女○朱傳云謂姪娣○莊十九公羊傳云諸侯娶一國則二國往媵之以姪娣從姪者何兄之子也娣者何弟也諸侯一聘九女諸侯不再娶○成八年左傳云衛人來媵共姬禮也凡諸侯嫁女同姓媵之異姓則否杜預釋例云古者諸侯取適夫人及左右媵各有姪娣皆同姓之國國三人凡九女參骨肉至親

所以息陰訟陰訟息所以廣繼嗣○穀梁傳云一人有子三人緩帶范注欲共享其祿也○爾雅云女子謂舅弟之子為姪女子同出謂先生為妯後生為娣注同出謂俱嫁事一夫○白虎通云備姪娣从者謂其不相嫉妬也一人有子三人共之若已生之不娶兩娣者傳異氣也娶三國女何廣異類也恐一國血脈相似俱無子也姪娣年雖少猶從適人者明人君無再娶之義也還待年于父母之國未任答君子也二國來媵誰為尊者

大國為尊國等以德德同以色質家法天尊左文家法地尊右

按媵有二種諸侯娶九女夫人及二媵俱有姪娣大夫士無二媵即以姪娣為媵大夫備姪娣曲禮大夫不名世臣姪娣喪大記大夫撫姪娣是也士不必備士昏禮雖無娣媵先是也鄭注士昏禮云娣尊姪卑考諸經傳竝無以姑為媵之文蓋姑尊非可從嫁朱子釋諸姬云姪娣釋諸姑云即諸姬殆是瞽說爾雅

云同出謂先生為如是姊得為媵矣

沛

箋云沛禰所嫁國適衛之道所經○朱傳云皆自衛來時所經之處○蘇氏云書濟入於河溢為滎春秋傳衛敗于滎澤故沛水及衛○水經濟濟水出河東垣縣東王屋山○禹貢云導沇水東流為濟入于河溢為滎東出于陶丘北又東至于荷又東北會于汶又北東入于海○玉海云濟水在孟州濟源縣西北三里平地而出有

二源東源周回七百步深不可測西源周回六百八十五步深一丈源出王屋山○風俗通云濟者齊齊其度量也

按說文沛沔也東入于海濟水出常山房子贊皇山東入泝二水音同經傳通誤書沛為濟惟此經文不誤耳應劭遂以出贊皇者為沛失之遠矣一統志濟在河南懷慶府濟源縣西北三里源發王屋山下既見而伏復出于此有東西二源合流至溫縣南入黃

河其水性下且勁過黃河之南溢而為滎往東若斷
若續或伏或見而入于海

飲餞

說文餞送去也○傳云祖而舍輟飲酒於其側曰餞○
韓詩章句云送行飲酒曰餞

禰

寰宇記云大禰溝在曹州冤句縣北七十里○一統志
大禰溝在山東兗州府曹州界內詩飲餞于禰即此今

於塞

姑

爾雅云父之姊妹為姑○釋名云姑故也于已為久故
之人

姊

爾雅云男子謂女子先生為姊疏云姊咨也以其先生
言可咨問

干

毛傳云干言所適國郊也○地里志東郡有發干縣曹氏曰即此所謂干○玉海云故發干縣今開德府觀城今觀城縣屬山東東昌府○路史云郡國志衛縣南有干城詩出宿于干者今開封有邗溝

言

隋云邢州內丘縣有干言山○水經注泝水又東南經干言山○一統志干言山在直隸順德府唐山縣西北四里衛詩出宿于干飲餞于言即此

按涕禰干言諸地孔氏云衛女所嫁國適衛之道所
經見今不知所嫁何國古人釋地名及一統志所載
亦俱影響耳曹氏既以干為發干縣一統志復以干
言為一山其參錯不同如此豈可據信

脂

爾雅云冰脂也○內則注云脂肥凝者釋者曰膏○爾
雅疏云對例則異散文則脂膏皆摠名也

牽

釋文云牽車軸頭金也○說文云車鍵○釋名云轄害也車之急害也牽轄音義同○禮書云轄以冒轂轄以制軸二者皆金為之○詩正義云牽無事則脫行乃設之○淮南子云車之能轉千里者其要在三寸轄

肥泉

爾雅云歸異出同肥疏小水支分歸入大海則異其泉源初出則同流者名肥○釋名云所出同所歸異曰淝泉本同出時所浸潤少所歸各枝散而多似淝者也○

水經注馬溝水出朝歌城北又東流與美溝合又東南注淇水為肥泉詩我思肥泉毛云同出異歸為肥泉今是水異出同歸

須

水經注濮渠東逕須城北衛詩云思須與曹也○地里志云東郡須昌縣故須句國○一統志須城廢縣在兗州府東平州○傅氏曰自須至漕由東而西也

駕

後漢輿服志云乘輿所御駕六餘皆駕四注古文尚書
曰予臨兆民凜乎若朽索之御六馬逸禮王度記云天
子駕六馬諸侯駕四大夫三士二庶人一周禮四馬為
乘毛詩天子至大夫同駕四士駕二易京氏春秋公羊
說皆云天子駕六許慎以為天子駕六諸侯及卿駕四
大夫駕三士駕二庶人駕一史記曰秦始皇以水數制
乘六馬鄭玄以為周禮乘馬有四圉各養一馬也諸侯
亦四馬顧命時諸侯皆獻乘黃朱乘亦四馬也今帝者

駕六此自漢制與古異耳○王肅云古者一轅之車駕三馬則五轡其大夫皆一轅車夏后氏駕兩謂之驪殷益以一駢謂之駟周人又益一駢謂之駟本从一驂而來亦謂之驂○埤雅云說文曰駢駕二馬也尚書大傳曰命於其君然後得乘駢馬驂駕三馬也駟駕四馬也詩曰載駟載駟駟以言大夫駟以言諸侯白虎通曰天子駕六者示有事于天地四方也列子亦云六轡不亂而二十四蹄所投無差則古有駕六之制矣或曰天子

之馬盛則駕六常則駕四○呂覽乘雅作駕

北門篇

門

釋名云門捫也在外為人所捫摸也○說文云門从二戶象形○易云重門擊柝以待暴客○月令仲冬乃修闔扇鄭注因蟄蟲啓戶耕事少間而治門戶也用木曰闔用竹葦曰扇○左傳云啓塞從時注門戶道橋謂之啓城郭牆塹謂之塞

天

春秋說題辭云天之言顯也居高理下為人經紀故其字一大以鎮之○禮統云天鎮也神也珍也施生為本運轉精神功效列陳其道可珍重也○周易云大哉乾元萬物資始乃統天雲行雨施品物流形大明終始六位時成時乘六龍以御天乾道變化各正性命又云天行健又云立天之道曰陰與陽又云天地之道貞觀者也○左傳云天有六氣降生五味注曰六氣謂陰陽風

雨晦明○毛傳云尊而君之則曰皇天元氣廣大則稱
昊天仁覆愍下則稱旻天自上降監則稱上天據遠視
之蒼蒼然則稱蒼天○爾雅云穹蒼蒼天也春為蒼天
夏為昊天秋為旻天冬為上天疏歐陽尚書說春曰昊
天夏曰蒼天與爾雅異○廣雅云東方皞天東南陽天
南方赤天西南朱天西方成天西北幽天北方玄天東
北變天中央鈞天○爾雅疏考靈耀云一度二千九百
三十二里千四百六十一分里之三百四十八周天百

七萬一千里者是天園周之里數也以圍三徑一言之
直徑三十五萬七千里此為二十八宿周迴直徑之數
也然二十八宿之外上下東西各有萬五千里是為四
遊之極謂之四表據四表之內并星宿內總有三十八
萬七千里然則天之中央上下正半之處則一十九萬
三千五百里地在于中是地去天之數也○河圖括地
象云易有太極是生兩儀兩儀未分其氣混沌清濁既
分伏者為天偃者為地又云西北為天門東南為地戶

天門無上地戶無下注天不足西北是天門地不滿東南是地戶又云天左動起于牽牛地右動起于畢○河圖帝覽嬉云黃道一青道二出黃道東赤道二出黃道南白道二出黃道西黑道二出黃道北日春東從青道夏南從赤道秋西從白道冬北從黑道○渾天儀注云天如雞子地如雞中黃弧居于天內天大地小天表裏有水天地各乘氣而立載水而行周天三百六十五度四分度之一又中分之則半覆地上半繞地下故二十

八宿半見半隱天轉如車轂之運也○素問云積陽為天故天者清陽也○五經通義云天神之大者曰昊天上帝即耀魄寶也亦曰天皇大帝亦曰太乙其佐曰五帝東方青帝靈威仰南方赤帝赤熛怒西方白帝白招拒北方黑帝叶光紀中央黃帝含樞紐一說蒼帝名靈符赤帝名文祖白帝名顯紀黑帝名玄矩黃帝名神斗河圖曰其精東為蒼龍南為朱鳥中央為麟西為白虎北為玄武○晉書云天二端謂之南極北極出地三十

六度南極入地三十六度兩極相去一百八十二度半
彊繞北極徑七十二度常見不隱繞南極七十二度常
隱不見

北風篇

北風

爾雅云北風謂之涼風○呂氏春秋曰北風謂之寒風
○易緯云冬至廣莫風至

雪

釋名云雪綏也水下遇寒氣而凝綏綏然也○左傳云
凡平地盈尺為大雪○月令孟春行冬令雪霜大摯孟
冬行秋令雪霜不時○曾子云陰氣盛則凝為雪○韓
詩外傳云凡草木花皆五出雪花獨六出雪花曰霰雪
雲曰同雲○西京雜記云太平之代雪不封條凌殄毒
害而已○潛潭巴云大雪甚厚必有女主天雪連月陰
作威宋均曰雪為陰臣道○埤雅說文云凝雨說物者
从彗蓋雪雨之可埽者也亦能淨坩穢若彗所謂以泰

雪爽者以淨為義臘雪握之輒聚立春以後不復可搏亦以微溫搏之故也夏小正云農及雪澤言雪澤之無高下也

赤

考工記云南方謂之赤○釋名云赤赫也太陽之色也

黑

爾雅云黑謂之黝○考工記云北方謂之黑○釋名云黑晦也如晦冥時色也

鳥

小爾雅云純黑而反哺者謂之烏小而腹下白不反哺者謂之雅烏白項而羣飛者謂之燕烏燕烏白脰烏○禽經云慈烏反哺白脰烏不祥巨喙烏善警哀烏吟夜注云烏之白脰者西南人謂之鬼雀鳴則凶咎○埤雅云烏一名鴉其名自呼體全黑今人聞鵲噪則喜聞烏噪則唾以烏見異則噪故輒唾其凶也傳曰烏樂空曠鵲樂稠鬧世云鴛交頸而感烏傳涎而孕莊子云烏鵲

孺蓋謂是與

按說文烏孝鳥也其赤白蒼三種或有三足者緯候
諸書皆以為嘉瑞非不祥鳥也莫黑匪鳥以喻衛君
臣皆惡必不援孝鳥為喻矣孔疏既不詳辨考爾雅
注疏但知有反哺不反哺白腹白項之辨而已陸農
師埤雅則混孝鳥與不祥之鳥為一本草禽部有二
種烏鴉慈鴉以吳地所產驗之慈鴉即反哺者其頸
白鳴聲啞啞人亦不惡之有一種純黑而惡聲者謂

之老鴉俗亦聞其鳴則凶則此詩之烏即今老鴉矣

靜女篇

首

釋名云首始也○元命包云頭者人所居上圓象天氣之府也歲必十二故人頭長一尺二寸○素問云頭者精明之主

彤管

傳云古者后夫人必有女史彤管之法史不記過其罪

殺之○左傳云靜女之三章取彤管焉注云女史記事
規誨之所執○禮云史載筆士載言○古今注牛亨問
彤管何也答曰彤者赤漆耳史官載事故以彤管用赤
心記事也○周禮女史掌王后之禮職掌內治之貳以
詔后治內政逆內功書內令凡后之事以禮從○李氏
云古者緘有管樂亦有管不知彤管何物也

牧

毛傳云牧田官也○周禮牧人掌牧六牲而阜蕃其物

山虞掌山林之政令大田獵則萊山田之野澤虞掌國澤之政令大田獵則萊澤野迹人掌邦田之地政為之厲禁而守之凡田獵者受令焉獸人凡田獸者掌其政令○朱傳云牧外野也○爾雅云郊外謂之牧牧外謂之野疏云牧者言可放牧也

蕘

埤雅云列子曰因為芻靡芻讀如稊稊茅之始生也

詩曰手如柔荑稊萋一也○箋云萋可以供祭祀○讀
詩記云大過九二枯楊生稊鄭康成易作萋然則所謂
稊者凡草木根芽皆是非獨芽也○七月疏云萋是葉
之新生者

新臺篇

新臺

水經注云鄆城北岬有新臺○寰宇記云在濮州鄆城
北十七里

按濮州今屬山東東昌府鄆城縣今省入州

臺

爾雅云閣謂之臺有木者謂之榭又云四方而高曰臺
○釋名云臺持也言築土堅高能自勝持也○月令仲
夏可以居高明可以處臺榭○五經異義云天子有三
臺靈臺以觀天文時臺以觀四時施化囿臺以觀鳥獸
魚鼈諸侯卑不得觀天文無靈臺但有時臺囿臺也○
國語伍舉云先王之為臺榭也榭不過講軍實臺不過

望氛祥故榭度於大卒之居臺度於臨觀之高瘠礪之地於是乎為之城守之木於是乎用之

河

釋名云河下也隨地下處而通流也○春秋說題辭云河之為言荷也荷精分布懷陰引度也○援神契云河者水之伯上應天漢○風俗通云江河淮濟為四瀆瀆通也所以通中國垢濁○爾雅云河出崑崙虛色白所渠并千七百一川色黃百里一小曲千里一曲一直又

云水自河出為澗○尚書云導河積石至于龍門南至
于華陰東至于底柱又東至于孟津東過洛汭至于大
伾北過泝水至于大陸又北播為九河同為逆河入于
海○學記云三王之祭川也皆先河而後海王制云天
子祭四瀆視諸侯○京房易傳云河者經天亘地之水
○易乾鑿度云天降嘉應河水先清三日清變為白白
變為赤赤變為玄玄變為黃各三日○山海經云不周
之山北望諸毗之山臨彼嶽崇之山東望沕澤河水所

潛也其源混混泡泡注沕澤即蒲昌海河之重源也○
淮南子云河以逶迤故能遠○漢書谷永云河中國之
經瀆聖王興則出圖書王道廢則竭絕潰溢橫流漂沒
陵阜異之大者也○桓子新論王平仲云周譜言定王
五年河徙故道今所行處非禹所穿○初學記云崑崙山
白水出其東北甌屈向東南潛行地下至規期山北流
分為兩源一出葱嶺一出于闐復合東注蒲昌海復潛
行地下南出積石山西南流又東迴入塞過張掖南與

洮河合出龍門至華陰潼關與渭水合又東迴過砥柱
及洛陽至鞏縣與洛水合成臯與濟水合又東北流過
武德與沁水合至黎陽信都鉅鹿之北遂分為九河又
合為一河而入海○元史云朶甘衛西鄙直馬湖蠻部
正西三千餘里去雲南麗江府西北一千五百里水從
地湧出百餘泓方七八十里履高瞰之燦若星列因名
星宿海東北流百餘里匯為大澤又東流為赤賓河又
合忽蘭等河始名黃河又東北至陝西蘭縣始入中國

又東北經沙漠地折而南流入山西境凡九千餘里○
苑洛語錄云河至河間永平二府播為九河古平州之
南滄州之北也逆河今永平府東境大海發一洋自東
而西古逆河也轉曲之間撫寧縣有碣石古驪城也今
河徙而逆河尚存

水

釋水云澨反入潭沙出汧出不流瀼天出尾下水醮曰
屠水決之澤為汧決復入為汧水注川曰谿注谿曰谷

注谷曰溝注溝曰澮注澮曰瀆○說文云水準也北方之行象衆水並流中有微陽之氣也徐曰衆屈為水至柔能攻堅故一其內也○元命包云水之為言演也陰化淖濡流施潛行也故其立字兩人交一以中出者為水一者數之始兩人譬男女言陰陽交物以一起也又云水者天地之包幕五行之始萬物之所由生元氣之津液也○易云坎為水潤萬物者莫潤乎水○尚書云五行一曰水水曰潤下潤下作鹹○黃帝書云天在地

外水在天外水浮天而載地者也○管子云地者萬物之本原諸生之根死水者地之血氣如筋脈之流通者也故曰水具材也夫水淖弱以清而好灑人之惡仁也視之黑而白精也量之不可使滯至滿而止正也唯無不流至平而止義也人皆赴高已獨赴下卑也卑也者道之室王者之器也而水以為都居○荀子孔子曰夫水徧與諸生而無為也似德其流也卑下倨句必循其理似義浩浩乎不居似有道其赴萬仞之壑不懼似勇

主量必平似法盈不求槩似正綿弱微達似察以出以入就潔似叢發源必東似志是以君子見大水必觀焉

○子華子云樓三陽之正氣于水樞其專精之名曰太一太一正陽也水含太一之中精故能潤澤萬物而行乎地中○淮南子云水上天為雨露下地為潤澤無所私而無所公靡濫振蕩與天地鴻洞無所左而無所右蟠委錯紛與萬物終始是謂至德○漢書李尋上言曰五行以水為本其星玄武婺女天地所紀終始所生水

為準平王道公正修明則百川理落脈通偏黨失綱則
涌溢為敗

蘧藤

晉語云蘧藤不可使俛注蘧藤偃人又云蘧藤蒙瓊○
朱傳云蘧藤本竹席之名人或編以為困其狀如人之
擁腫而不能俯者故又因以名此疾也淮南子霜文沈
居若簟蘧藤注蘧藤葦席

網

廣雅云魚網謂之罟○說文云網庖義所結繩以田以魚也○周易云伏羲作結繩而為網罟蓋取諸離○抱朴子曰太昊師蜘蛛而結網○世本云芒作網○國語里革云古者大寒降土蟄發水虞于是乎講罟罾取名魚登川禽而嘗之寢廟行諸國人助宣氣也○漢書云豺獾未祭罟網不布墜澤

鴻

毛傳云大曰鴻小曰雁○周易漸曰初六鴻漸于干六

二鴻漸于磐九三鴻漸于陸六四鴻漸于木九五鴻漸于陵上九鴻漸于陸其羽可用為儀吉○尸子云鴻鵠之擊羽翼未合而有四海之心○揚子云鴻飛冥冥弋人何篡焉○埤雅云鴻之為物其進也有漸其飛也有序又其羽可用為儀君子之道也禮曰前有車騎則載飛鴻飛鴻有行列故也○博物志曰鴻鵠千歲者皆胎產鴻雁大畧相類以仲秋來賓一同也鳴如家鵠二同也進有漸飛有序三同也雁色蒼而鴻色白一異也雁

多羣而鴻寡侶二異也毛有粗細形有大小又曰鴻毛為囊可以渡江不漏

戚施

國語云戚施不可使仰注云僕人又云戚施直鑄○朱傳云亦醜疾也

按爾雅釋訓云遽篠口柔也戚施面柔也疏云人口柔者必仰面觀人顏色而為辭似遽篠不俯之人因名口柔者為遽篠面柔者必低首下人媚以容色似

戚施之人因名面柔者為戚施爾雅之作本為釋詩
鄭本以申傳旨蓋衛宣公下淫子婦為鳥獸行詩人
度其孤媚之態故以口柔面柔者醜之鄭意未為失
歐陽永叔曲加掊擊未詳厥趣又韓詩薛君章句云
戚施蟾蜍喻醜惡說文作鼃鼃引此詩文即爾雅云
鼃鼃蟾諸郭云似蝦蟆居陸地淮南謂之去蚊者也
本草圖經云形大背上多痂磊行極遲緩不能跳躍
亦不解鳴多在人家下濕處其腹下有丹書八字抱

卷十三
朴子云蟾蠩壽三千歲者頭上有角領下有丹書八字文子云蟾蠩辟兵壽在五月之望蓋其形亦醜惡而可畏者也似蝦蟆非即蝦蟆本草經云蝦蟆一名蟾蜍一名醜混矣

六家詩名物疏卷十三

欽定四庫全書

六家詩名物疏卷十四

明

馮復京

撰

國風鄘一

鄘

通典云衛州新鄉縣西南三十二里有鄘城即鄘國○
孔氏曰王肅服虔以鄘在紂都之西孫毓云據鄘風定
之方中楚丘之歌鄘在紂都之南明矣○一統志鄘城
在河南衛輝府城東北一十三里又新鄉縣西南三十

二里有古鄗國

柏舟篇

髦

內則云子事父母櫛緦笄總拂髦男女未冠笄者櫛緦
笄總拂髦總角注拂髦振去塵著之髦用髮為之象幼
時鬢其制未聞又云三月之末擇日翦髮為鬢男角女
羈否則男左女右注鬢所遺髮也夾肉曰角午達曰羈
○玉藻云親沒不髦○喪大記云小斂主人脫髦注云

諸侯禮也○既夕禮云既殯主人脫髦○左傳云豈如
弁髦而因以敝之○許慎云髦髮至眉○箋云禮世子
昧爽而朝亦櫛緝笄總拂髦疏云髦者事父母之飾若
父母有先死者於死三日脫之服闋又著之若二親竝
沒則因去之○項氏云髦者以髮作偽髻垂兩眉之上
如今小兒用一帶連雙髻橫繫額上是也○禮書云子
之幼也父母翦髮為之髻及其長也因以為飾謂之髦
存而不忍棄所以順父母之心長而不忘幼所以示人

子之禮及親死始猶幸其生焉未忍脫之三日之後則
幸生之心已矣脫之可也髦毛長而特出者也故凡物
長毛皆謂之髦禮記所謂髦畝尋所謂鬣髦皆長毛也

牆有茨篇

牆

互見召南埔

說文云垣蔽曰牆○釋名云牆障也所以自障蔽也○
禮書云牆者埔垣之總名

茨

爾雅茨蒺藜注布地蔓生細葉子有三角刺人○陶隱居云多生道上其葉布地子有刺狀如菱而小長安最饒人行多著木履易云據于蒺藜言其凶傷詩云牆有茨不可埽也以刺梗穢也○本草衍義云蒺藜有二等一等杜蒺藜即今之道旁布地而生或生牆上有小黃花結芒刺此正是牆有茨者又一種白蒺藜出同州沙苑牧馬處黃紫花作茨結子如羊內腎○埤雅云可以茨牆故謂之茨○師曠占云歲欲早早草先生旱草蒺

藜也○韓詩外傳云春植桃李夏得陰其下秋得食其實春植蒺藜夏不得采其葉秋得其刺焉

中葺

箋云內葺之言謂宮中所構成頑與夫人淫昏之語○說文葺交積材也象對交之形○前漢梁王共傳聽聞中葺之言注應劭曰中葺材構在堂之中也晉灼曰魯詩以為夜也顏師古曰構謂舍之交積材木也應說近之○集韻葺博雅夜也詩中葺之言○呂東萊云中葺

當從應顏說蓋閭內應與之處

君子偕老篇

副

釋名云王后首飾曰副副覆也以覆首亦言副貳也兼用衆物成其飾也○天官追師掌王后之首服副編次注副之言覆所以覆首為之飾其遺象若今之步搖矣服之以從王祭祀○毛傳云編髮為之○祭統云君純冕立于阼夫人副禕立于東房○廣雅云假結謂之鬢

案續漢書輿服志云皇后入廟步搖以黃金為山題貫白珠桂枝相糾八爵九華熊虎赤能天鹿辟邪鄭氏所見之步搖其制蓋如此宋玉諷賦云主人之女垂珠步搖則步搖亦古矣鄭氏之說雖未必信然要非編髮為之若編髮則是編矣

笄

釋名云笄係也所以係冠使不墜也○三禮圖云笄簪也士以骨大夫以象○士冠禮皮弁爵弁笄同篋○周

禮弁師掌王之五冕王笄諸侯之繅綽九就玉笄○追
師掌追衡笄鄭司農云衡維持冠者春秋傳曰衡紘紘
紘後鄭云王后之衡笄皆以玉為之惟祭服有衡垂於
副之兩旁當耳其下以紘懸瑱笄卷髮者○曲禮云女
子許嫁笄而字內則云女子十有五而笄二十而嫁雜
記女雖未許嫁二十而笄禮之婦人執其禮燕則鬢首
案笄今之簪也男子冕弁冠皆得施之婦人十五笄
則亦嘗飾耳惟玉笄為后夫人祭服之盛飾祭統副

禕則以配禕衣此詩其之翟也則以配揄闕二翟內
外命婦服鞠衣展衣祿衣者俱不得用喪服傳云吉
笄者象笄也則卿大夫士及其妻或皆用象與若桑
笄箭笄榛笄則喪服所用或當無貴賤一也此詩毛
傳云笄衡笄蓋聯引追師追衡笄之文以見笄之為
玉也衡笄二物衡垂於當耳笄橫於頭上朱傳誤以
衡笄為一云笄垂於副之兩旁當耳其下以紘懸瑱
此乃釋衡非釋笄也

珈

箋云珈之言加也如今步搖上飾古制所有未聞疏云
六珈飾之有六○說文云婦人首飾从玉珈聲

翟

傳云禴翟闕翟羽飾衣也箋云侯伯夫人之服自禴翟
以下如王后○鄭注周禮云翟雉名伊洛而南素質五
色皆備成章曰翟江淮而南青質五色皆備成章曰搖
王后之服刻繒為之形而采畫之綴于衣以為文章禕

衣畫翬者揄狄畫搖者闕狄闕而不畫此三者皆祭服
從王祭先王則服禕衣祭先公則服揄翟祭羣小祀則
服闕翟今世有圭衣蓋三翟之遺俗○玉藻云王后禕
衣夫人揄狄君命闕翟再命鞠衣一命禮衣士祿衣○
崔靈恩云王后三翟數皆十二王者之後諸侯夫人三
公而下夫人如命數

按翟毛氏謂羽飾衣鄭謂刻繒采畫不用真羽六服
之色毛云展用丹縠孫毓推之以為禕衣亦揄翟青

闕翟黑鞠衣黃展衣赤祿衣黑鄭賈之徒則云祿衣
黑展衣白鞠衣黃闕翟赤褕翟青禕衣玄古制無稽
各以意為說不足多辨

髮

釋名云髮拔也拔擢而出也○援神契云髮法星辰○
真誥云髮者腦之華腦減則髮素

雲

釋名云雲猶云云衆盛意也又言運也行也○說文雲

山川氣也从雨云象回轉形也○春秋說題辭云雲之為言運也動陰路觸石而起謂之雲含陽而起以精運也○禮記云天降時雨山川出雲○周禮保章氏以五雲之物辨吉凶水旱降豐荒之祲象鄭司農曰二至二分觀雲氣青為蟲白為喪赤為兵荒黑為水黃為豐○易通卦驗云冬至初陽雲出箕如樹立春少陽雲出房如積水春分正陽雲出軫如白鵠穀雨太陽雲出張如車蓋立夏初陰雲出觜如赤珠夏至少陰雲出參如水

波寒露正陰雲出井如冠纓霜降太陰雲出鬼上如羊
下如蟠石○左傳云凡分至啟閉必書雲物為備故也
○元命包云陰陽聚為雲○斗威儀云人君乘水而王
其政和平則景雲見景明也言雲氣光明○史記若烟
非烟若雲非雲郁郁紛紛蕭索輪囷是謂卿雲○西京
雜記云太平之時雲則五色而為慶三色而成禱○瑞
應圖云喬雲外赤內黃○呂氏春秋云山雲艸莽水雲
魚鱗旱雲烟火雨雲水波無不比類其所生以示人○

初學記云雲師曰屏翳

瑱

詳見卍充耳

釋名云瑱鎮也懸當耳旁不欲令人妄聽自鎮重也

象

說文云象長鼻牙南越之大獸三歲一乳○爾雅云南方之美者有梁山之犀象焉○左傳云象有齒以焚其身○運斗樞云瑤光之精散而為象○呂氏春秋曰肉之美者髦象之約○嶺表錄異云象肉有二十種象膽

不附肝隨月轉在諸肉楚越之間象皆青黑惟西方弗
林大食多白象雲南豪族多畜象負重致遠若中國之
牛馬○本草云身有百獸肉皆自有分段惟鼻是其本
肉○酉陽雜俎云象膽隨四時在四腿春在前左夏在
前右如龜無定體鼻端有爪可拾鍼古訓云孕五歲始
產○南州異物志云象之為獸形體特詭身倍數牛目
不踰狶鼻為口役望頭若尾馴良承教聽言則跪素牙
玉潔載籍所美服重致遠行如丘徙○沈懷遠南越志

云象牙長丈餘脫其牙則深藏之削木代之可得不爾窮其土得乃已○埤雅云象性久識能浮水出沒命在其鼻食物皆以鼻取之其牙生花必因雷聲故古者以為器飾○雅翼云象鼻長三丈大如臂能別道之虛實稍虛輒不敢過馴者能拜起從人意世言物象凡有數義望頭如尾有混成之象一曰感雷而齒又生有象焉一曰有進止威儀之象一曰斧象者見星月而沒亦合于天象云

掃

釋名云掃摘也所以摘髮也○疏云以象骨搔首因以
為飾○詩緝云若今之篦

皙

說文云人色白也从白析聲○楊用修云男白曰皙女
白曰玼

帝

史記天官書云太微三光之庭其內五星五帝坐○文

耀鈞云蒼帝其名靈威仰赤帝其名赤燂怒黃帝其名
含樞紐白帝其名曰招拒黑帝其名汁光紀○禮正義
云天皇北辰耀魄寶又云昊天上帝又名太一帝君以
其尊大故有數名也昊天上帝得連上帝而言至于單
名皇天單名上帝亦得月令季夏供皇天上帝鄭分之
皇天耀魄寶上帝大微五帝亦是上帝單號之事若然
大帝得單稱與五帝全五帝不得兼稱皇天昊天也○
禮書云周禮有言祀天有言祀昊天上帝有言上帝有

言五帝者言天則百神皆預言昊天上帝則統乎天者
言五帝則無預乎昊天上帝言上帝則五帝兼存焉五
帝與昊天全稱帝不與昊天全稱天猶諸侯與天子全
稱君不與天子全稱王孝經曰郊祀后稷以配天宗祀
文王于明堂以配上帝則明堂之祀上帝其為昊天上
帝及五帝可知也易曰先王以作樂崇德殷薦之上帝
以配祖考以配祖者天也以配考者五帝也合天與帝
而謂之上帝則易孝經之于周禮其義一矣詩書之文

未有稱五帝而書亦未有稱昊天上帝者其稱天及上帝類皆泛言之而已

展

周禮注云展衣以禮見王及賓客之服字當為禮禮之言亶亶誠也○禮書云白者陰之純色見王及賓客服之以見王及賓客無事乎飾一於誠焉后禮之懿也

清揚

孔仲達云以目視清明因名為清揚者眉上之美名因

謂眉上眉下皆曰揚目上目下皆曰清故野有蔓草傳云清揚眉目之間猗嗟傳云目下為清

顏

說文云眉目之間也○應劭云顏頤頤也齊人謂之頤汝南淮泗之間曰顏○方言云頤頤顏頤也

案頤頤曰顏朱傳云頤角豐滿者非正解顏字也以詩文畧補之

邦

釋名曰大曰邦邦封也封有功于是也

媛

釋訓云美女曰媛孫炎曰君子之援助

桑中篇

唐

爾雅云唐蒙女蘿女蘿菟絲孫炎曰別三名郭璞云別四名又云蒙王女郭云蒙即唐也女蘿別名○博雅云女蘿松蘿也兔丘兔絲也○本草經云菟絲子一名菟

蘆一名菟縷一名唐蒙一名王女一名赤網一名菟纍
生朝鮮川澤田野蔓延艸木之上色黃而細為赤網色
淺而大為菟纍○毛有類者弁傳云女蘿菟絲松蘿也
○陸璣疏云菟絲蔓連艸上生黃赤如金○陶隱居云
田野墟落中甚多皆浮生藍紵麻蒿上○日華子云苗
莖似黃麻線無根苗多附田中艸被纏死或生一叢如
席閣開花結子不分明如碎黍米粒八月九月已前採
○呂氏春秋云或謂兔絲無根非無根也其根不屬地

茯苓是也○龜策傳云下有茯苓上有兔絲○淮南子云兔絲無根而生茯苓抽兔絲死○抱朴子云兔絲之艸下有伏兔之根無此兔在下則絲不得生於上然實不屬也又內篇云兔絲初生之根其形似兔掘取剖其血以和丹服之立變化任意所作

案本艸艸部有兔絲木部有松蘿松蘿一名女蘿性味及所生全別爾雅云女蘿兔絲故毛公有類者弁傳云女蘿兔絲松蘿也陸璣駁之以為二物殊異予

謂此非爾雅之誤乃毛公之誤也艸木多有名同實異者兔絲名女蘿松蘿亦名女蘿小雅所稱之女蘿正是松蘿非兔絲也書傳言兔絲根不屬地是也云上有茯苓下有兔絲鄭漁仲云茯苓生山谷兔絲生人間清濁異趣何由同居抱朴子言兔絲初生根似兔今亦未有見者故圖經疑為別種

沫

晉書地道記朝歌城本沫邑武丁始遷居之為殷都有

新聲靡樂○黃氏云沫水在衛之北○書酒誥云明大命於妹邦注妹地名紂所都朝歌以北是疏妹與沫一也屬鄘○一統志朝歌城在大名府濬縣西七十里紂所都也其南有糟丘酒池土人猶依約識之

鄉

說文云國離邑民所封鄉也○合璧事類云鄉之為言向也衆所向也○周禮大司徒五州為鄉使之相賓以鄉三物教萬民而賓興之以鄉八刑糾萬民小司徒頒

比法於六鄉之大夫鄉師各掌其所治鄉之教而聽其
治鄉大夫各掌其鄉之政教禁令鄉士各掌鄉之獄訟
○禮書曰鄉之民以禮義為主遂之民以功事為主鄉
官之爵鄉學加遂一等鄉所辨有貴賤遂辨老幼廢疾
而已鄉徵賦有閭師遂則里宰徵斂而已鄉大祭祀羞
牛牲遂凡祭祀共野牲而已鄉官大喪執纛御匱執斧
涖匠師遂官大喪帝幄先道抱磨共籠而已鄉稽鄉器
遂稽稼器鄉三年大比考德行道藝而興賢者能者遂

三歲大比則興眊明其有功者屬其地治者此鄉遂之辨也然遂之相保相賙相葬相賓不異於鄉鄉之相受相糾不異於遂鄉之田法同於遂遂之軍法同於鄉○詩正義云天子六軍出自六鄉諸侯三軍出自三鄉

姜

三皇紀云炎帝神農氏長于姜水因以為姓○國語云姜伯夷之後也韋昭曰伯夷堯秩宗炎帝之後四岳之族○正義云列國姜姓齊許申呂之屬不斥其國未知

誰國之女也

桑中

譜云東及兗州桑土之野正義曰禹貢兗州云桑土既
蠶注云其地尤宜蠶桑因以名之今濮水之上地有桑
間濮陽在濮水之北是有桑土明矣○禮記云桑間濮
上之音亡國之音也其政散其民流誣上行私而不可
止注濮水之上地有桑間者亡國音於此水出昔殷紂
使師延作靡靡之樂已而自沈於濮水後師洧過焉夜

聞而寫之為晉平公鼓之桑間在濮陽南○郡國志東
郡濮陽縣有頡帝家皇覽曰冢在城門外廣陽里中博
物記曰桑中在其中○一統志廢濮陽縣在直隸大名
府開州治西南

上宮

通典云衛州衛縣有上宮臺

麥

說文曰麥芒穀秋種厚糞故謂之麥麥金也金王而生

火王而死○春秋說題辭云麥之為言殖也寢生觸凍而不息精射刺直故麥含芒事且立也○禮記月令云孟夏之月農乃登麥天子乃以彘嘗麥先薦寢廟是月也麥秋至仲秋之月乃勸種麥無或失時○夏小正三月初祈麥實麥實者五穀之先見者故急祈而記之九月鞠榮鞠艸也鞠榮而樹麥時之急也○尚書大傳云秋昏虛星中可以種麥○援神契云黑墳宜黍麥○呂氏春秋云得時之麥祠長而頸黑二七以為行而服薄糕

而赤色稱之重食之致香以息使人肌澤且有力先時者附動蚰蛆而多疾後時者弱苗而穗蒼狼薄色而美芒又云孟夏之昔殺三葉而獲大麥豨首生而麥無葉而從事于蓄藏○漢書董仲舒說上曰春秋他穀不書至于麥禾不成則書之以此見聖人于五穀最重宿麥○管子云夏至而麥熟天子祀大宗其盛以麥穀之始也○蔡邕月令章句云百穀各以其初生為春熟為秋故麥以孟夏為秋○廣雅云大麥麩也小麥麩也○記

勝之書云凡田六道種麥為首子欲富黃金覆謂曳柴
壅麥根也夏至後七十日寒地可種宿麥又云麥早種
穗強而有節晚種穗小而少實○陶隱居云麥有大小
穰穰即宿麥亦謂種麥○本草圖經云麥有大麥小麥
穰麥蕎麥穰麥有二種一種類小麥一種類大麥○博
物志云啖麥令人多力○雅翼云麥者接絕續乏之穀
夏之時舊穀已絕新穀未登民于此時乏食而麥最先
熟故以為重比他穀獨隔歲種故號宿麥亦或以為首

種秋種冬長春秀夏實備有四時之氣而說文以麥為
金者特以其金玉而生遇火而死鄭注月令則云麥實
有孚甲屬木黍秀舒散屬火麻實有文理屬金菽實孚
甲堅合屬水稷五穀之長屬土此據明堂月令四時與
中央所食為說古者朝事之豆有麴黃先儒以麴為熬麥

弋

朱傳云弋春秋或作姒蓋祀女夏后氏之後亦貴族也
按春秋左傳定十五年秋七月壬申姒氏卒九月辛

已葬定如穀梁作弋氏定弋

庸

路史國名紀風俗通云古用國見毛詩在高唐乃用地故有用姓庸用音相近○補傳云鄘本庸姓之國漢有庸光及膠東庸生是其後也

鴝之奔奔篇

鴝

爾雅云鴝鴝其雄鶉牝痺注鴝屬疏鶉即上云鴝鴝母

田鼠所化者又云鴉子鴉鴉子鷄注別鶴鴉鷄之名○
內則云雉兔鴉鷄○運斗樞云機星散為鴉德義少殘
百家則鴉生○夏小正云三月田鼠化為鴉鴉鷄也化
而之善故盡其辭也鴉為鼠化而之不善故不盡其辭
也○周書時訓云清明之日桐始華又五日田鼠化為
鴉○素問云鴉鷄也○本草云四月巳前未堪食是蝦
蟆化為○禽經云鴉鷄野則義恭則搏注月令田鼠化
為鴉關東謂之鴉蜀隴謂之循在田得食鳴相呼夜則

羣飛盡則草伏馴養之久見食相搏鬪也○談苑云至道二年夏秋間京師鶩鶉者積於市門是時雨水絕無蛙聲人有得於水坎者半為鶉半為蛙列子天瑞篇云蛙變為鶉斯不謬矣又田鼠亦為鶉物變非一揆也○本草衍義云鶉有雌雄從卵生何言化也嘗于田野屢得其卵初生謂之羅鶉至初秋謂之早秋中秋已後謂之白唐一物四名○埤雅云鶉無常居而有常匹俗言此鳥淳蠢不越橫草遇小草橫其前即旋行避礙名之

曰淳以此筆談曰古人取象不必大物天文家朱鳥乃取象於鷓鴣有丹白二種此丹鷓也色赤黃銳上禿下夏出秋藏飛必附草皆火類也○雅翼云鷓居易容食易給竄伏淺草隨地而安故言上世之俗曰鷓居穀食尾特禿若衣之短結傳稱子夏貧衣若懸鷓性好鬪物之小而健無若此者

按鷓鴣二物但鷓亦鷓類故田鼠化為鴛鄭氏注夏小正傳以為鷓而莊子禽經竝以為鷓也鷓本有雌

雄卵生亦或有化為者據夏小正傳云田鼠化列子
楊大年云蛙化淮南子本草云蝦蟇化交州記黃魚
上化為鷄是又有魚化者矣

君

傳云國小君

○禮王制云夫人自稱于諸侯曰寡小君

○孔安國論語注小君君夫人之稱

六家詩名物疏卷十四